

## MSM CATAT KERUGIAN SEBELUM CUKAI BAGI SUKU PERTAMA TAHUN KEWANGAN 2026 SEBANYAK RM13 JUTA BERIKUTAN TEKANAN MARGIN

*Kumpulan mempercepatkan usaha penstrukturan dan pengoptimuman operasi untuk memperkukuh margin serta memulih keuntungan.*

**KUALA LUMPUR, MEI 26, 2026** – MSM Malaysia Holdings Berhad (“MSM” or “Kumpulan”), pengeluar gula bertapis terkemuka Malaysia berjenama “Gula Prai”, mencatatkan kerugian sebelum cukai (LBT) sebanyak RM13 juta pada suku pertama berakhir 31 Mac 2026 bagi tahun kewangan berakhir 31 Disember 2026 (S1TK2026). Prestasi ini dibandingkan dengan keuntungan sebelum cukai (PBT) sebanyak RM8 juta yang dicatatkan pada suku pertama tahun kewangan sebelumnya.

Prestasi tersebut didorong terutamanya oleh purata harga jualan yang lebih rendah, pengurangan jumlah jualan dan kadar penggunaan kapasiti yang lebih rendah, yang mana telah meningkatkan kos penapisan seunit meskipun kos pengeluaran berkaitan input adalah lebih rendah.

Jumlah pendapatan Kumpulan bagi suku tersebut berjumlah RM552.8 juta, menurun sebanyak RM196.9 juta atau 26.3% berbanding RM749.7 juta pada S1TK2025. Penurunan ini terutamanya disebabkan oleh purata harga jualan (ASP) yang lebih rendah serta pengurangan jumlah jualan.

Dari segi operasi, kos pengeluaran menurun sebanyak 7% tahun-ke-tahun, disokong oleh harga NY11, kadar pertukaran asing dan kos pengangkutan yang lebih rendah. Walau bagaimanapun, keadaan ini sebahagiannya diimbangi oleh peningkatan 17% dalam kos penapisan berikutan faktor penggunaan kapasiti (UF) yang lebih rendah.

Mengulas mengenai keputusan tersebut, Ketua Pegawai Eksekutif Kumpulan MSM, Dr. Aini Shahar, berkata, “Keputusan S1TK2026 mencerminkan tekanan margin berterusan yang dihadapi oleh industri gula domestik, khususnya disebabkan oleh harga jualan yang lebih rendah, persaingan gula import serta kadar penggunaan yang lebih rendah.”

Walaupun persekitaran operasi kekal mencabar, pihak Pengurusan telah mengambil tindakan segera bagi memperkukuh disiplin margin, menyelaraskan pengeluaran mengikut permintaan, dan mengoptimumkan kos di seluruh Kumpulan.

"Ketidaktentuan geopolitik yang berterusan berpotensi menyebabkan turun naik yang lebih ketara terhadap harga komoditi, kos pengangkutan serta kadar pertukaran mata wang asing. Oleh itu, fokus kami adalah jelas – untuk melindungi aliran tunai, memperkukuh disiplin operasi serta memulihkan keuntungan melalui kawalan komersial yang lebih ketat, pengoptimuman pengeluaran dan pengagihan modal yang berdisiplin," tambah Dr. Aini.

MSM terus giat bekerjasama dengan Kerajaan untuk memuktamadkan rangka kerja penetapan harga yang mampan bagi melindungi keselamatan makanan negara dan menyokong kelangsungan jangka panjang industri gula domestik.

Sejak tahun 1964, MSM telah memainkan peranan penting dalam industri gula Malaysia. Kini, sebagai antara 10 penapis gula terbesar di dunia, Kumpulan terus memperkukuh kecemerlangan operasi, kemampanan serta keselamatan makanan, sambil mengambil langkah tegas untuk memperkukuh daya tahan jangka panjang.

**-TAMAT-**

### **Maklumat MSM Malaysia Holdings Berhad (MSM)**

MSM Malaysia Holdings Berhad (MSM) ialah pengeluar gula bertapis terkemuka Malaysia dan salah satu syarikat penapis gula terbesar di Asia. MSM terlibat dalam pengeluaran, pemasaran dan penjualan produk gula bertapis di bawah jenama "Gula Prai". Syarikat ini menjalankan perniagaan terutamanya melalui dua anak syarikatnya, MSM Prai Berhad dan MSM Sugar Refinery (Johor) Sdn Bhd. Di samping itu, MSM juga mengendalikan sebuah syarikat logistik – MSM Logistics Sdn Bhd.

Pada masa ini, kapasiti pengeluaran tahunan MSM mencecah 2.05 juta tan gula bertapis. Pada tahun 2025, MSM mengeluarkan sebanyak 1,028,283 MT gula bertapis, di mana 216,038 MT adalah untuk pasaran eksport. Ketika ini, MSM menguasai sehingga 60% syer pasaran domestik. MSM telah disenaraikan di Pasaran Utama Bursa Malaysia sejak 28 Jun 2011 dan mempunyai modal pasaran sebanyak RM654 juta pada 31 Disember 2025. MSM menggabungkan kejayaan ekonomi bersama perlindungan alam sekitar dan tanggungjawab sosial untuk masa depan yang mampan.

MSM menawarkan pelbagai rangkaian produk daripada gula bertapis putih pelbagai saiz sehinggalah ke gula perang halus. Kesemua produk ini telah dipasarkan dan dijual di dalam pelbagai bentuk pilihan pembungkusan di bawah jenama "Gula Prai". MSM juga turut menjual 'molasses' sejenis produk sampingan yang dihasilkan menerusi proses penapisan gula hingga ke produk penyulingan dan penghasilan etanol, makanan haiwan dan yis antara lain-lain produknya. Selain daripada produk pengguna isi rumah, MSM menjual kepada pelbagai pelanggan di Malaysia dan juga negara-negara lain secara langsung dan tidak langsung melalui pedagang, pemborong dan pengedar. Para pelanggan termasuklah syarikat-syarikat besar dalam industri minuman dan makanan, hotel, restoran dan rangkaian kedai-kedai makanan.

Untuk maklumat lanjut, sila layari [www.msmsugar.com](http://www.msmsugar.com)

### **Pernyataan Berpandangan Ke Hadapan**

Beberapa pernyataan dalam laporan ini mengenai operasi MSM adalah berbentuk pernyataan yang berpandangan ke hadapan. Pernyataan ini boleh dikenal pasti dengan kata-kata kunci seperti "percaya", "menganggarkan", "mengharapkan", "menjangka", "berhasrat", "mungkin", "akan", "merancang", "prospek" dan perkataan lain yang mempunyai maksud yang berkaitan dengan perbincangan mengenai prestasi operasi atau kewangan masa hadapan. Pernyataan ini berkaitan dengan rancangan, objektif, matlamat, strategi, operasi dan prestasi masa hadapan MSM. Keputusan dan hasil sebenarnya mungkin berbeza daripada yang diunjurkan dalam mana-mana pernyataan yang berpandangan ke hadapan disebabkan oleh pelbagai peristiwa, risiko, ketidakpastian dan faktor lain yang terlibat. Kami tidak berhasrat atau tidak menanggung apa-apa obligasi untuk mengemas kini atau meminda mana-mana pernyataan yang berpandangan ke hadapan, sama ada disebabkan oleh maklumat baharu, peristiwa masa hadapan atau sebaliknya.

*Untuk pertanyaan media, sila hubungi:*

**Siti Noorbaya Mohd Yunus**  
+6016 677 6118  
[noorbaya.my@msmsugar.com](mailto:noorbaya.my@msmsugar.com)